

西

夏

書

事

西夏書事卷十

青浦 吳廣成西齋 纂

大中祥符八年

契丹開泰四年春三月德明表請市鹽復責

入質不遣

德明以西鹽不通蕃部困敝遣牙內指揮白守貴
詣京師陳請朝議德明必欲通鹽禁惟子弟入質
方許蓋以必不可從之事絕之也德明果不肯遣
于是禁鹽如初

夏四月蕃部浪密囊等叛投環州

德明蕃部指揮浪密囊麻孟桑二人授環州真宗以前有熟戶逃亡曾爲西界所納可移牒追取俟其遣還乃以浪密囊等付之

五月遣使入獻

夏國進奉使入邊輒鬻其所乘馬邊人以價值賤爭市之于是使者帶馬日多疆吏以聞真宗詔嚴其禁

秋八月西蕃唃噠攻夏州拒卻之

唃噠吐蕃贊普裔初居宗哥城與論逋李立遵

不協徙居邈川有勝兵六七萬自西涼破潘羅支
舊部聳昌廝均等悉歸唃噲囉回鶻降者復數萬
由是富強時以兵攻夏州德明禦卻之唃噲囉希
朝廷賜予請聚舉國之衆助討夏州真宗以其累
次侵邊或有變詐命周文質監涇原軍曹瑋知秦
州備之

冬十一月築堡麟州建榷場

初延慶二州熟戶其親族在西界輒私致音問潛
相貿易夏人因以爲利中國察其奸不許德明乃

于麟州之濁輪谷築堡建榷場以誘致商旅真宗
詔緣邊安撫使禁止之

大中祥符九年

契丹開泰五年

夏五月德明使蕃騎寇慶州

德明數請市鹽私置榷場不得在國點閱兵馬陰
謀侵掠兀泥族大首領名厓其從父盛佶先爲保
吉所虜授白池軍主密遣使告名厓名厓以聞真
宗命邊臣謹備之至是有夏州蕃騎千五百入寇
慶州爲內屬蕃部邀擊敗還

按宋史真宗紀五月夏州蕃騎千五百入寇慶

州不言德明使茲特書之蓋德明以市鹽建場
不遂其欲糾集兵騎陰謀內擾慶州之寇不謂
德明使不得也

追上保吉尊號

德明旣僭帝制令官屬建議祀典劉仁最曰先王
創造大業中道崩殂今徵號未加非報本追崇之
意德明用其言上保吉尊號曰應運法天神智仁
孝至道廣德光孝皇帝廟號武宗群臣上表賀

按史言德明稱帝國中然猶外順宋命未有明

據觀于追上父號僭越顯然矣

秋七月夏州甘露降

德明大赦國中

按德明嗣位十餘年一書夏州旱再書恒星晝見皆災異也因其時圖伐甘州戾氣致變天道人事原相應耳茲書甘露降豈夏州朔漠有善政足以致之抑中朝之受天書迎聖祖草木雲霧無不稱祥上有好而下有甚者乎然德明自是而後併甘涼降瓜州兵威日熾是適以滋其

憚也

冬十月遣使入貢請詔約邊臣

德明數苦邊境鄜延鈐轄張繼能削竹爲簽署其上云以備記將士殺獲功狀德明聞之懼遣大校劉仁勗貢馬二十四匹上言蕃漢部落戎寇裸居刦掠是常逋亡不一臣自景德中來進誓表朝廷亦降詔書應兩地逃民緣邊裸戶不令停舍皆俾交還從茲謹守翰垣頗成倫理自向敏中歸闕張崇貴云亡後來邊臣罕守舊制各務邀功不虞生事

遂致延綏涇原等界擅舉甲兵入臣境土其有叛亡部族刦掠主財去者百無一回臣之邊吏亦務藏藏俱失奏論漸乖盟約臣今欲將所部應有南界背來蕃族人戶乞朝廷差到使臣就界上交付所有臣本道自進納誓表後走投南界蕃戶亦望下詔逐處發遣歸回未賜俞允卽望敦諭邊臣悉遵詔約肅清往來之奸寇止絕南北之逋逃俾臣得內守國藩外清戎落豈敢違盟負約有始無終盧享爵封取誚天下但恐朝廷不委茲事詔未察

本心須至剖陳上于天聽真宗答詔曰卿世濟勲
庸任隆屏翰翊忠規而奉上正師律以守藩布露
懇誠條陳章疏載加閱覽備悉傾輸且國家奄宅
中區統臨四海咸推覆育豈限邇遐凡命將帥之
臣惟存備禦之戒所有文字往來辭說異同部族
賤貧輒轉仇報掠過生口彼此交還其如不見端
倪互相誣執或因緣懷竊增飾邀求朝廷固不細
知邊壘亦爲常事及詳來奏深究弊源難悉難窮
當申約束已令鄜延涇原環慶麟府等路部署鈐

轄司今後約勒蕃部不得輒相割奪擅興甲兵凡
稍涉交爭須盡公措理其有廣佔阡陌隱庇逃亡
畫時勘窮押送所管卿本道亦宜嚴戒部下不得
更有藏匿各遵紀律共守封疆嘉歎之懷不忘寤
寐

涼州守將蘇守信死十一月甘州回鶻攻破之

德明使守信守涼州有兵七千餘馬五千匹諸蕃
畏其強不敢動回鶻貢路悉爲阻絕守信死其子
囉麻自領府事部衆不服甘州可汗夜落隔遣兵

攻破之據其族帳百餘斬級三百奪馬匹甚衆囉
麻棄城走于是涼州屬於回鶻

天禧元年契丹開泰六年春二月德明加太傅

德明聞中國有大典禮必遣使入賀是時真宗改元詣玉清昭應宮上玉皇大天尊寶冊袞冕謝天地于南郊大赦中外官並加恩會夏州使至詔加德明守太傅食邑千戶實封四百戶

夏六月有龍見于溫泉山

山在懷遠鎮北德明以爲瑞遣官祀之于是有遷

都之意

秋八月囉麻請取涼州不克

囉麻走入沙漠潛遣人至涼州約舊時蕃卒內應
請德明出兵赴援回鶻結六谷諸部拒之卒不能
克

天禧二年契丹開泰七年春三月德明掠甘州貢奉使

德明攻西涼不得志輒與甘州搆難偵知其貢使
安信等入京遣蕃部從間道掠之會正使先發僅
得餘騎而還

秋七月吐蕃遣使假道不許

吐蕃別種可汗并里尊以朝貢契丹道紓不能猝達契丹主諭以假道夏州并里尊遣使來請德明不許

天禧三年契丹開泰八年春二月德明繼立母卒

德明遣使告哀真宗以屯田員外郎上官佖充弔贈兼起復官告使閻門祇候常希古爲致祭使

按書卒不書氏史闕也

三月攻慶州敗官軍于柔遠砦

德明部落委乞骨咩大門諸族由柔遠砦寇慶州
巡檢楊承吉與戰不利真宗曰德明向順朝命邇
何頻次侵擾豈邊將失于撫綏耶命曹瑋爲副都

總管環慶秦州緣邊巡檢使備禦之瑋至慶州骨

咩大門等族爭內降

宋史夏國傳載德明攻柔遠在真宗乾興元年之明年乃仁宗天聖元年也而李氏長編在天禧三年三月

真宗紀骨咩大門等族歸附在天禧三年九月茲并敘

之

冬十一月加崇仁功臣號

崇仁賜親王重臣者時真宗郊祀受尊號故覃恩

天禧四年

契丹開泰九年

春正月德明屬羌寇延州

德明數受中國恩禮志氣驕盈不復謹約蕃部宥
州羌臘兒率衆劫延州熟戶門鬼族金明監押李
士彬率兵擊之斬臘兒奪馬三百匹真宗詔鄜延
部署司以其事報德明

夏四月兩月並出

見西南方

五月契丹兵攻涼甸擊走之

并里尊以假道不許不復朝契丹契丹主歸罪德

西夏書事

卷十

八

明親將兵五十萬佯言出獵直攻涼甸德明率衆
逆拒敗之

附李氏長編天禧四年六月辛丑鄜延鈐轄周
文質言趙德明繼遣人騎寇掠熟戶望多發兵
馬于慶州界破蕩族帳以遏侵擾按德明繼遺
屬在何時宋史無考

冬十一月城懷遠鎮爲興州定都之

靈州懷遠縣始于後周宋初廢爲鎮保吉取靈州
時盡逐居民城外遂皆徙依懷遠德明以龍見之

祥思都其地謀之于衆僉曰西平土俗淳厚然地
居四塞我可以往彼可以來不若懷遠西北有賀
蘭之固黃河繞其東南西平爲其障蔽形勢利便
洵萬世之業也况屢現休徵神人允協急宜卜築
新都以承天命德明善之遣賀承珍督役夫北渡
河城之構門闕宮殿及宗社籍田號爲興州遂定
都焉朱史夏國傳德明城興州在乾興二年而李氏長編在天禧四年末其考異云德明正傳載城興州在李士彬斬羌酋臘兒後不得其時
考士彬斬臘兒在本年正月故附年未今從之
史臣曰河自南來入青銅峽與西夏羣山相會出

西夏書卷一
九
峽口北流三百餘里直接賀蘭興靈包絡其中可謂四塞險固矣西夏據此二百餘年後以韓范經營亦不能恢復雖元昊諒祚輩梟雄難制亦其憑恃者險也

按此西夏定都之始

天禧五年契丹太平元年夏五月德明終喪入內都知藍繼宗來賜起復

德明與繼宗較射繼宗每發必中德明驚服遺以所乘名馬

按凡賜起復無故可不書此書美繼宗也德明
自張崇貴卒輕視中國日肆鴉張今繼宗較射
多中使知中朝材武卽宦寺中且不乏人也

秋七月契丹暨夏平封德明大夏國王

德明旣卻契丹兵謹封堠嚴點集爲備契丹主見
進奉使不至恐爲邊患諭意講和德明亦請臣貢
如初契丹主遣金吾衛上將軍蕭孝誠賚冊授德
明爲尚書令晉大夏國王

按西夏自繼遷跳梁德明款附雖有逆順之分

然其心總易視中國畏視契丹非惟資其援助抑亦憚其兵威也契丹知其然一切不稍假借故其勢常尊今一戰不勝而願與之平且稱爲大夏是其不競直與宋同春秋例和而不盟曰平暨者不得已也書以譏之

冬十一月使如契丹謝

德明謝契丹封冊獻良馬二十匹凡馬百匹

乾興元年

契丹太
平二年

春正月德明加純誠功臣號

德明自歸順以來每歲旦聖節冬至皆遣牙校進

獻朝廷恩錫官告每以襲衣五金荔支帶金花銀
匣副之又銀沙鑼盆合千兩錦綵千匹金塗銀鞍
勒馬一匹副以纓遣內臣就賜之

夏五月表請大食國貢使取道夏州

大食波斯別種其入貢路由沙州涉夏境抵秦州
德明思掠其進奉物上表請敕使者道其國中時
仁宗新立知其詐不許詔大食自今入貢取海路
由廣州入京師

秋七月納洪德砦蕃官慶香降

環州洪德岩蕃族巡檢慶香與屬戶者龍等十八人詣供奉官胡寧給稱夏兵入邊諸族危迫寧信之率衆赴援至歸德川伏發戰死慶香率本族三百餘帳亡入夏界德明納之環州部署招之還者幾二百香等百餘戶不出

八月西蕃宗哥族侵夏州

天禧初宗哥族酋長馬波叱臘等與伏羌岩蕃部廝雞波連結爲亂知秦州曹瑋率神武軍破之野吳谷餘衆遁走沙漠至是舉衆侵夏州德明治兵

相攻殺西州貢路不通

九月契丹使賀生辰

德明生辰契丹主使堂後官張克恭來賀

宋仁宗天聖元年

契丹太平三年春正月德明加尚書令

仁宗卽位改元故

二月萬子軍主蘇渴嵬內附

中國授三班奉職賜名李文順居之陳州

秋八月掠平涼

戎人剽忽多詐出沒不時德明部落屢肆侵掠朝

廷莫之間時有衆萬人入渭州直犯平涼方渠等
州守將與軍候周美追擊破之戎人從九井原烏
崙河遁

冬十月閻門祗候康德興來賜冬服

德興父贊元雍熙中爲作坊使嘗從曹光實襄地
斤澤夏人謂德興曰前戰靈武康將軍非先世耶
德興憚復仇給曰非也

按上犯平涼此賜時服賞之愈濫感之愈微德
明之肆宋實啟之

天聖二年契丹太平四年春二月德明作省嵬城于定州

定州省嵬山在懷遠西北百餘里土地膏腴向爲
蕃族樵牧地德明于山之西南麓築城以馭諸蕃
夏四月綏州蕃寇保安軍

蕃族軍主罔列等擊敗之鄜延路以聞仁宗令以
其事報德明

六月遣使入謝

德明使至中國私市禁物隱關稅爲奸利戶部郎
中薛奎知延州請留蜀道縑帛于關中轉致給之

樊遂絕

宋史奎傳云事在元昊時李氏長編載在是年六月戊寅考奎以天聖二年六月知

延州三年二月徙并州旋改秦州七年

二月參知政事景祐元年八月卒傳誤

冬十月月犯井鉞

鉞一星附東井前

天聖三年

契丹太平五年夏五月太白犯辰星

在東井十三度

西羌亂六月遣使來假兵不許

環原州屬羌撒逋渴等擁衆數萬圍柳泉鎮鵠鵠

泉砦環慶都監趙士隆都指揮杜澄戰死洪德砦

主趙振引諸將援之抵平遠力戰七日破其圍斬首數千級羌勢大衰使人渡河求助德明守境不應羌衆不支請降

按德明洵有功于宋矣是時羌衆雖敗猶冀夏州之援以圖再舉自德明拒之始望絕而降矣書以予之

秋七月中國遣使來諭

羌人之亂仁宗以德明爲疑遣使詔諭德明據實以聞

冬十一月貢于契丹

契丹主以德明勢日強盛厚賜使者遣還

十二月月犯東井

按宋史天文志自是年十二月至六年七月共

月犯東井七

天聖四年

契丹太平六年

春二月德明請與并代二州和市

時陝西已有榷場二德明復請于并代路置場和

市仁宗許之

夏六月遣兵助契丹攻甘州

甘州回鶻阿薩蘭部叛契丹契丹主遣魏國公蕭
惠徵諸路兵討之德明點集蕃衆遣之西出蕭惠
攻甘州三日不克部下阻卜諸酋復叛急引歸德
明兵亦還

秋八月熒惑入東井

十餘日始去

附遼史聖宗紀太平六年冬十月遣使問夏國

五月與宋交戰之事考宋史仁宗紀是年五月

無夏人構兵事

天聖五年

契丹太平七年

春二月德明入貢

德明遣都知兵馬使白文美入貢方物且告其東南蕃部多有叛入漢界者乞賜還仁宗詔鄜延部署司據數遣之

夏四月歸中國逃戶

初中國沿邊軍民之逃者必爲熟戶畜牧或以遺遠羌易羊馬故常沒者數百人間有自歸者中道輒爲夏人所得是時仁宗聞落蕃戶口日多命夏州護送境上德明遵詔還之

附

五朝史五月壬寅以延州金明縣都監李士彬爲供備庫副使初西人寇金明士彬與弟士均率兵擊敗之斬首千餘級據長編考異云西人或是趙德明或是屬羌未考

秋九月有星沒東井

出于北河沒于東井

按德明自仁宗登極西州尙屬相安而恒星列

曜垂異分野史不勝書蓋是時元昊年長雄圖漸啟戎馬生郊戰爭方始天文預兆未始無因

也

西夏書事卷十終

西夏書事卷十一

青浦 吳廣成西齋 繫

天聖六年

契丹太平八年夏五月德明使子元昊攻回鶻取

甘州

初德明降真宗錄其誓表令渭州遣人賚至西涼府曉諭諸蕃部及甘沙首領于是諸州雖與德明抗使介猶相往來及德明數侵回鶻其可汗夜落隔益遣使貢方物結援中朝德明知其故遣元昊將兵突至甘州襲破之

李氏長編云德明每不聽元昊用兵其攻陷甘州想

非德明意故傳稱元昊忽引兵襲破甘州是德明不在兵間可知攷德明于祥符中嘗五次圖甘州李氏以爲非德明意不可信夜落隔歸順王倉卒出奔元昊置

兵戍其地而還

元昊取甘州實錄正史皆不著年月日長編併敘于德明臨卒時宋

史夏國傳則年而不月續綱目記在是年五月

按

甘州東據黃河西阻弱水南跨青海北控居

延綿亘數千里通西域扼羌瞿水草豐美畜牧孳息漢竇融嘗謂河西殷富帶河爲固張掖屬國精兵萬騎一旦緩急杜絕河津足以自守豈非以山川扼塞負隅易固哉晉張氏世有其地

併于苻堅後張掖爲沮渠蒙遜所都唐嗣聖中
甘州積穀至四十萬斛瓜沙以西皆仰其餉貞
元後吐蕃據之遂以富強今德明得之恃其形
勢制馭西蕃靈夏之右臂成矣

遂立元昊爲太子

德明三子長元昊衛慕氏生次成遇咩米氏生幼
成嵬訛藏屈麌氏生元昊性雄毅多大畧好衣長
袖緋衣冠黑冠佩弓矢每出乘馬令從衛步卒張
青蓋以二旗前導百餘蕃騎自隨十餘歲時見德

明以馬權易漢物不如意輒斬使者嘗諫曰吾戎人本從事鞍馬今以易不急之物已非策又從而殺之則人誰肯爲我用乎德明奇之及長圓面高準身長五尺餘沈括筆談曹瑋在陝西日聞元昊常來牙市中欲識之屢使人伺之不可得乃使圖其狀貌視之真英物也逆知後日必爲邊患云通兵法精野戰歌及太乙金鑑訣遇戰鬪謀勇爲諸將先數勸德明勿臣宋且曰吾部落實繁財用不足苟失衆何以守邦不若以所得俸賜招養蕃族習練弓矢小則四行征討大則侵奪封疆上下豐盈于計爲得德

明曰吾久用兵疲矣吾族三十年衣錦綺此宋恩
也不可負元昊曰衣毛皮事畜牧壽性所便英雄
之生當霸王耳何錦綺爲至是德明以元昊氣識
英邁諸蕃簪服遂冊爲太子

按僭國立子無故可不書此何以書惡稱太子
也太子非侯國所敢稱元昊梟雄德明先以帝
制待之他日之稱帝決矣

立衛慕氏爲后

衛慕銀夏大族德明旣立元昊爲太子立衛慕氏

爲后以顯之

秋九月契丹使賀生辰

使人吳克勤應對嫋雅德明待之有加禮

天聖七年

契丹太平九年春二月德明爲元昊請婚契丹

元昊先娶於母族衛慕氏至是德明欲結好契丹
遣使請婚契丹主許之

夏五月觀察使阿遇子內奔阿遇掠麟州

遇子與父不合挈從人投麟州阿遇索之不得以
部衆入州境大掠民戶約還子乃歸所據

秋九月麟州將張岳來索俘戶還之

麟州以阿遇侵掠不已縱其子還及索所據阿遇
負約不遣安撫使令牙將張岳詰問阿遇辭窮留
岳共食以佩刀貫大鬚啞岳引吻就刀食阿遇
復弦弓張鏃指岳腹而發岳神色不動阿遇擲弓
撫其背曰真男兒也翌日與岳縱獵雙兔起馬前
岳發矢連斃之阿遇驚服遺岳馬馳悉歸所據如
約

天聖八年契丹太平十年春三月回鶻瓜州王請降德明納

之

瓜州回鶻乃沙州分部其王賢順見德明勢日熾

率屬請降

高居壽使于闐記云自靈州過黃河行五百里至涼州又西五百里至甘州西北五百里至肅州西渡金河西百里出天門關又

西百里出玉門關經吐蕃界西至瓜州一統志瓜州古西戎地漢爲敦煌郡晉分晉昌郡唐初置瓜州後陷于吐蕃其城在肅州西五百二十六里時

德明雖得甘州與瓜州尚距千里中隔肅州回鶻與夏國世仇賛順何以遽降宋史回鶻傳不載疑夏國傳有

悞俟攷

秋九月火星入南斗

西州謠言火星入南斗天子下堂走德明出居賀

蘭山禮之

冬十二月德明獻馬求經

德明獻馬七十匹乞賜佛經一藏仁宗從之并以
祀圜丘大赦加賜德明功臣號

天聖九年契丹太平十一年夏六月契丹使至興州告哀

契丹聖宗崩也

冬十月遣使如契丹奠慰

德明先遣使奉慰繼使銀州都押牙賀惟貴奠慰

遼史禮志夏奠慰進賄使至契丹契丹主與太后居殿塗殿分南北闇坐使至幕次宣賜素服皂帶

更訖先祭奠使副捧祭文南洞門入臣僚並舉哀至丹墀立西上閣門使受祭文上殿啟封置香案哭引使副南階上殿至褥位立揖再拜大使近前上香退再拜復近前跪捧臺杌奠酒三遇再拜揖客隨中書二舍人跪伏讀祭文訖舉哀下殿近南面北立于是一弔慰使副亦從南洞門入四使同向靈前再拜引出歸幕次契丹太后別殿坐弔慰使副捧書匣右入當殿立閣門使受書匣上殿奏封全開讀訖使副從南階上殿傳達弔慰訖下殿近南北面立俟祭奠使副入四使同見鞠躬再拜不出班奏聖躬萬福再拜出班謝面天顏又再拜立俟傳諭撫問就位謝再拜引出歸幕次契丹主御南殿使副入見如見太后儀加謝遠接撫問湯藥再拜受賜例物卽日就館燕

十二月契丹以興平公主歸元昊

公主契丹宗室女時興宗新立封元昊爲駙馬都

尉爵夏國公遣兵衛公主至興州元昊以數萬騎
托言親迎留屯府州境知州折惟忠率麾下備禦
戒士卒勿妄動一夕風霆有數誕馬突走惟忠營
衆驚報惟忠臥不起徐命擒獲之元昊知不可動
乃退

明道元年契丹興宗重熙元年春正月熒惑犯東井

犯井東北星

夏五月德明封夏王

德明稱臣三十年頻窺邊境中國約束之卽引還

貢獻之使歲時不絕仁宗以其恭順遣使持冊封夏王車服旌旗降天子一等又加食邑千戶德明尋上表謝

按此夏王錫號之始必中國封之其名乃正

秋七月鎮星犯鬼

犯東南星時大風揚塵拔木德明心惡之既祝日

涼州其當之乎

九月取涼州

自回鶻取涼州德明常謀恢復是時懼朝廷令六

谷諸酋赴援先遣蕃部侵環慶走局承直李德以
聞仁宗命鄜延路移文戒約之使人未至興靈德
明已命元昊將兵攻涼州回鶻勢孤不能拒遂拔
其城

按西涼南界橫山西通西域東距河西土宜三
種善水草所謂涼州畜牧甲天下者也昔漢人
取之號爲斷匈奴右臂德明立國興靈不得西
涼則酒泉敦煌諸郡勢不能通故其畢世經營
精神全注于此但繼遷取西涼而難作德明復

西涼而身亡豈歲星在越時果不利耶抑天道
惡盈不使貪心得饗也

冬十月夏王趙德明卒

年五十一遣使入京告哀仁宗輶朝三日同皇太
后乘輿至幕殿服素服爲德明舉哀贈太師尚書
令兼中書令以開封府判官度支員外郎朱昌符
昌符道病侍御史孫祖德代之爲祭奠使六宅副使內侍省押班
馮仁俊副之賜賄布三百匹絹七百匹副以上醞
米羊麪將葬賜物稱是皇太后所賜亦如之

宋史
夏國

傳作天聖九年
十月德明卒誤

按禮諸侯曰薨大夫曰卒得明旣書夏王不書薨書卒不子其王也蓋德明受爵天朝跡其稱帝國中侵掠邊境意中豈復有天子乎昔周室東遷諸侯放恣夫子作春秋外諸侯皆書卒蓋變文斥之也後夏主書卒倣此

論曰德明當西涼大創之後諸戎叛漢之初若猶執前修苟循覆轍河南討擊之師不崇朝而集矣于是表守遺言誓修職貢朝聘之使往來

如家牛羊繒帛彼此各受其利使塞垣之下有耕無戰逾三十年殆所謂識時務者耶迨俸賜旣贍兵力亦完然後東戰契丹南扼蒼耳北城懷遠西拔甘涼粟支數年地拓千里夏國之業實基于此元昊雖雄非藉德明燕翼其遂夜郎自大乎嗚呼雖曰偏據亦云偉矣

葬于嘉陵

在賀蘭山元昊稱帝後追號

子元昊嗣十一月授定難軍節度使西平王

元昊時年二十九仁宗命工部郎中楊告爲旌節
官告使禮賓副使朱允中副之授元昊特進檢校
太師兼侍中定難節度夏銀綏宥靜等州觀察處
置押蕃落使西平王告等至興州元昊遷延不出
迎及見使者猶遙立不動屢促之乃受詔拜起顧
左右曰先王大錯有如此國而猶臣拜于人耶旣
而享告等子廷設席欲自尊告婉折以禮始以客
位讓然東屋後有千百人破礪聲告知有異志不
敢詰也

改姓嵬名氏稱吾祖

元昊旣襲封衣白窄衫玷冠紅裏冠頂上獨垂紅
結綬表異蕃衆復以李趙賜姓不足重自號嵬名
氏稱吾祖吾祖華言可汗也于是屬族悉改嵬名
蕃部尊榮之疎族不與焉

按自古僭號之主改姓者二一劉勃勃嫌其祖
從母姓改赫連氏一北魏孝文取拓跋爲土之
義改元氏元昊其有所取耶抑有所嫌也夫襲
封伊始卽改賜姓他時叛逆已兆于此

使如契丹賀應聖節

應聖節法天皇太后生辰也

十二月契丹賜冊爲夏國王

元昊告哀契丹契丹主宗真以婚好之誼遣宣徽
南院使朔方節度蕭從順潘州觀察使鄭文圖持
冊封元昊夏國王賜良馬三十四匹精甲二具

明道二年契丹重熙二年元昊改元顯道

元昊招納亡命申明號令以兵法部勒諸蕃族每
出兵必率部長與獵有獲則下馬環坐而食割鮮

佐飲各問所見擇取其長因避父諱改中國明道

元爲顯道稱于國中

天運紹統元昊改元顯道
在景祐元年與宋史異

按此西夏改元之始嫌名不諱二名不偏諱故臨文無忌焉况正朔之頒大典攸係元昊以父二名而輒改之僭端見矣故以改元直書

春正月貢于契丹

夏使回沿路私市金鐵契丹主下令禁之

禁市金
鐵遼史

興宗紀在十二月
茲因使貢連及之

三月下禿髮令

元昊欲革銀夏舊俗先自禿其髮然後下令國中使屬蕃遵此三日不從許衆共殺之于是民爭禿其髮耳垂重環以異之

夏四月中國使賜太后遺物

章獻皇太后崩仁宗使供備庫副使李用和持賜遺留

五月升興州爲興慶府遂立官制

元昊自先世併吞西土三十餘年聚中國所賜貲財無算外倚契丹爲援異謀日甚升興州爲府改

名與慶廣宮城營殿宇其名號悉仿中國所稱故
事羌俗以帳族盛大者爲長官亦止有蕃落使防
禦使都押牙指揮使之職至是始立文武班曰中
書掌進擬庶務宣奉命令屬有侍郎散騎常侍諫議大夫舍人司諫等官曰樞密掌國兵防邊備與中書對持文武二柄曰三司總國屬有樞密同知副使僉書承制等官計應貢賦之入屬有正使副使鹽鐵使度支使等官曰御史臺掌糾察官邪肅史大夫御史中丞殿中曰開封府掌尹正畿甸之御史監察御史等官事屬有六曹左右軍巡使判官當等官曰翊衛司司統制訓練藩衛右軍公事幹當等官都指揮副都指揮及諸衛上將軍大將軍之號曰官計司司文武諸事官有馬步都指揮副都指揮及諸衛上將軍大將軍之號

閻注籍

曰受納司

司倉庾貯積及給受等事

曰農田司

司倉儲委積平

利農屬有司農卿

少卿

丞主簿等官

曰群牧司

司內外九牧國馬屬有制置使副使

都監

曰飛龍苑

專防護宮城警捕盜賊以武幹

等官

曰

磨勘司

司選敘磨勘

曰文思院

掌造金銀犀玉金

冊

責

其制多與宋同

自中書樞密宰相御史大夫

之用

彩繪素以供輦

侍中太尉以下

命蕃漢人分爲之

而其專授蕃職

有甯令有謨寧令有丁盧有丁弩有素齋有祖儒

有呂則有樞銘皆以蕃號名之

按書西夏職官始此

別服式

文資則幞頭靴笏紫衣武職則冠金帖起雲縷冠
紺衣金塗銀黑束帶垂蹀躞穿靴或金帖紙冠間
起雲銀帖紙冠餘皆禿髮衣紫旋襯下垂束帶佩
解結椎短刀弓矢羈馬乘鯢皮鞍垂紅纓打跨鉞
拂便服則紫皂地繡盤球子花旋襯東帶民庶則
衣青綠以別貴賤

按書西夏服式始此

秋七月遣將蘇奴兒攻西蕃朶牛城被執

吐蕃與貢州數搆兵，唃噲懼，爲所併。屢使人至
秦州求內屬。仁宗詔授寧遠大將軍、愛州團練使。
旋進保順軍節度觀察留後。元昊惡其強，遣令公
蘇奴兒將兵二萬五千攻麓牛城。城中兵迎戰，奴
兒敗被執。

九月復攻麓牛城。冬十月破之，屠其民。

元昊聞奴兒敗，自率兵赴援，復攻麓牛。經月不下。
遣人詐約和陰以兵躡其後，俟城開入據之。大殺
居民，無遺。李氏長編言元昊屠麓牛城當在景祐二年而趙珣聚米圖經繫之明道二年

景祐元年

契丹重熙三年

元昊開運元年春正月改元

元昊雖仍貢奉然車服儀衛悉擬帝制至是策士
楊守素上言王者神武立功德威御衆要必建元

表歲以示維新國家累世經營規模宏遠猶遵中

國舊號豈足彪炳皇猷昭示區宇元昊乃下諭改

顯道三年爲開運元年大赦國中

填星犯輿鬼

占者云大臣有變元昊大肆殺戮

二月以兵攻府州

初元昊于沿邊山險之地三百餘處修築堡砦
以收集老弱並驅壯健爲入寇計邊將領兵驅逐
元昊遂激怒蕃衆侵掠府州境而還

按此元昊用兵中國之始

夏五月復攻府州

仁宗詔并代州部署司各嚴兵備

秋七月掠環慶

慶州西七十里爲馬嶺砦若北十餘里有蕃部殺
牛族領族帳二千餘戶負險自固向不附中國元

昊令爲前驅掠環慶州境殺戮居人朝廷下詔約束不聽

築白豹城及後橋堡遂犯慶州執都監齊宗矩
白豹東接金湯北鄰葉市與後橋諸砦侵入漢界
百餘里阻絕延慶二州經過道路元昊先修白豹
已復增築後橋小堡慶州柔遠砦蕃部巡檢嵬逋
發兵攻破之元昊聲言復仇直犯慶州緣邊都巡
檢楊遵柔遠砦監押盧訓以騎七百戰于龍馬嶺
不勝環慶路都監齊宗矩走馬承受趙德宣寧州

都監王文赴援次節義峯元昊伏兵以待通事蕃

官偵以告宗矩不聽過濠迎戰元昊發伏執宗矩

歸久之始放還

續綱目書趙元昊寇環慶以嵬邇攻後橋堡元昊報仇爲目攻宋史

夏國傳自屬兩事又夏國傳元昊稱兵報仇在十

月弑母後李氏長編則載在七月茲事分爲兩而

月則同之

九月有星如太白出東井

色黃赤有尾跡向東沒光照地

冬十月殺逆臣山喜弑母衛慕氏

元昊嗣立尊衛慕氏爲皇太后

王氏東都事畧及李氏長編俱作米

母氏與宋史不同畢氏續資治通鑑云米其族人與衛聲相近蓋卽一字而譯語互異耳

山喜謀殺元昊事覺元昊沉山喜族于河進酰弑

衛慕氏

宋史夏國傳衛慕氏死遣使來告哀不言元昊酰之也今從李氏長編

遣使

入告哀仁宗以內殿崇班閣門祗候王中庸爲致

祭使兵部員外郎兼起居舍人郭勸爲弔贈兼起

復官告使授元昊鎮軍大將軍金吾衛上將軍員

外置同正員元昊贈遺勸等百萬勸悉不受旣而

元昊復立訛藏屈嘵氏爲兀泥兀泥者華言太后

也周禮曰子弑父凡在官者殺無赦當是時元

昊有覆載不容之罪使宋室有人則當窮治其惡正其弑逆之罪春秋之法許世子以不嘗藥而書弑况弑其母乎前寇邊不聞有伐叛之師此弑母不聞有討罪之舉則是上無天子下無方伯人類變爲禽獸矣噫

按山喜謀逆沉之宜也不書誅而書殺元昊身爲逆臣不以討逆之詞予之也至衛慕氏是其生母乃遷怒弑之忍心害理何如乎宋史不書茲揭書弑以正其罪

十一月子當令哥生

元昊第五娶野利氏出元昊見其貌類己特愛之
按元昊爲子弑母而弑父之子接踵而生天道
好還何其速也

十二月獻馬求經

元昊陰鶩峻誅殺然好浮屠學遣使獻馬五十四
求佛經一藏仁宗特賜之

西夏書事卷十一終